


Broj: 03-02-900/2021  
Sarajevo, 22.07.2021. godine

**PARLAMENT FEDERACIJE  
BOSNE I HERCEGOVINE**



- **Predstavnički dom-  
gosp. Mirsad Zaimović, predsjedavajući**
- **Dom naroda –  
gosp. Tomislav Martinović, predsjedavajući**

Poštovani,

U skladu sa članom IV. B. 7. c) (III) Ustava Federacije Bosne i Hercegovine, a u vezi sa odredbama člana 185. Poslovnika Predstavničkog doma Parlamenta Federacije Bosne i Hercegovine („Službene novine Federacije BiH”, br. 69/07, 2/08 i 26/20) i člana 177. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH”, br. 27/03, 21/09 i 24/20), dostavljam Vam **AMANDMANE VLADE FEDERACIJE BOSNE I HERCEGOVINE NA PRIJEDLOG ZAKONA O RODITELJIMA NJEGOVATELJIMA U FEDERACIJI BIH**, koje je Vlada Federacije Bosne i Hercegovine utvrdila na 275. sjednici, održanoj 22.07.2021. godine.

S poštovanjem,



**PREMIJER**

**Fadić Novalić**

**CO: FEDERALNO MINISTARSTVO RADA I SOCIJALNE POLITIKE  
gosp. Vesko Drljača, ministar**

Na osnovu člana 73. stav (4) Poslovnika o radu Vlade Federacije Bosne i Hercegovine – Prečišćeni tekst ("Službene novine Federacije BiH", br. 6/10, 37/10, 62/10 i 39/20), Vlada Federacije Bosne i Hercegovine je na 275. sjednici, održanoj 22.07.2021. godine, utvrdila

**AMANDMANE  
NA PRIJEDLOG ZAKONA O RODITELJIMA NJEGOVATELJIMA  
U FEDERACIJI BOSNE I HERCEGOVINE**

**AMANDMAN I**

Član 2. Zakona o roditeljima njegovateljima u Federaciji Bosne i Hercegovine (u daljem tekstu: Zakon) dopunjava se i mijenja tako da glasi:

**"Član 2  
(Pojam roditelja njegovatelja)**

(1) Roditelj njegovatelj u smislu ovoga zakona je roditelj lica sa 100% invaliditetom uzrokovanog bolešću ili poremećajem u razvoju, kao i slijepog lica čiji je ostatak vida na oba oka ispod 0,05 s korekcijom, odnosno roditelj lica koje se, prema nalazu Instituta za medicinsko vještačenje zdravstvenog stanja, ne može osposobiti za samostalan život niti može samostalno zadovoljavati barem jednu od sljedećih osnovnih životnih potreba:

- a) kretanje u stanu i izvan stana;
- b) uzimanje hrane;
- c) oblačenje i svlačenje;
- d) održavanje lične higijene ili
- e) obavljanje drugih fizioloških potreba.

(2) Status roditelja njegovatelja iz stava (1) ovoga člana može ostvariti i lice iz reda srodnika koje je, u skladu s odredbama Porodičnog zakona Federacije, nadležni organ imenovao za staratelja."

**Obrazloženje:** Predloženim izmjenama i dopunama člana 2. postiže se veća pravna jasnoća u pogledu stanja i funkcionalnosti lica s invaliditetom čiji bi roditelji, odnosno srodnici mogli ostvariti pravo na sticanje statusa roditelja njegovatelja s naglaskom na njihovu nemogućnost osposobljavanja za samostalan život i na vrste osnovnih životnih potreba koje ne mogu samostalno zadovoljavati. Osim toga, ovim se amandmanom mogućnost ostvarivanja prava na status roditelja njegovatelja proširuje i na druge srodnike lica s invaliditetom koje, u skladu s Porodičnim zakonom Federacije, nadležni organ imenuje za njegovog staratelja.

## AMANDMAN II

U stavu (3) člana 8. Zakona briše se ostatak teksta iza riječi "Uz ispunjavanje uslova propisanih ovim zakonom, status roditelja njegovatelja može se priznati roditelju do njegove navršene 65. godine života".

**Obrazloženje:** Predloženim brisanjem se ukida dobna granica čime se svim roditeljima, odnosno srodnicima daje mogućnost ostvarivanja i konzumiranja ovoga prava nezavisno od starosti lica s invaliditetom o kojemu brinu pod pretpostavkom da ispunjavaju druge uslove utvrđene ovim zakonom.

## AMANDMAN III

Briše se alineja i) iz stava (1) člana 10. Zakona. Dosadašnja alineja j) postaje alineja i).

**Obrazloženje:** Predloženim brisanjem se ukida dobna granica čime se svim roditeljima, odnosno srodnicima daje mogućnost ostvarivanja i konzumiranja ovoga prava nezavisno od starosti lica s invaliditetom o kojemu brinu pod pretpostavkom da ispunjavaju druge uslove utvrđene ovim zakonom.

## AMANDMAN IV

U članu 10. Zakona dodaje se novi stav (3) koji glasi:

" (3) U slučaju prestanka statusa roditelja njegovatelja zbog nekog od razloga iz stava (1) ovoga člana lice s invaliditetom može ostvariti pravo na dodatak za njegu i pomoć od drugog lica u skladu s odredbama Zakona o osnovama socijalne zaštite, zaštite civilnih žrtava rata i zaštite porodice sa djecom".

**Obrazloženje:** Dopuna člana 10. upućujućom odredbom iz stava (3) ima za cilj jasnije ukazati na činjenicu da prestankom statusa roditelja njegovatelja ne prestaje podrška licima s invaliditetom niti mogućnost ostvarivanja prava na druge oblike materijalne podrške u vidu prava na dodatak za njegu i pomoć drugog lica pod uslovima i na način na koji je to pravo regulisano postojećim Zakonom o osnovama socijalne zaštite, zaštite civilnih žrtava rata i zaštite porodice sa djecom.

## AMANDMAN V

U članu 11. stav (4) bosanske i srpske jezične varijante Zakona ispred riječi "centar za socijalni rad, odnosno opštinska služba za socijalnu zaštitu" dodaje se riječ "vrši".

**Obrazloženje:** Predmetni amandman predstavlja tehničku korekciju bosanske i srpske jezične varijante Zakona, imajući u vidu da je u njima naknadno uočen nedostatak glagola "vrši" kojim se definira obaveza centara za socijalni rad, odnosno opštinskih službi za socijalnu zaštitu u pogledu obračuna, prijave i uplate mjesečne naknade i pripadajućih

doprinosa, kao i prijave/odjave u Jedinostveni sistem registracije, kontrole i naplate doprinosa.

#### AMANDMAN VI

Stav (4) člana 17. Zakona mijenja se i glasi:

“(4) Protiv rješenja prvostepenog organa iz stava (3) ovoga člana može se izjaviti žalba i voditi postupak revizije”.

**Obrazloženje:** Predmetnim se amandmanom osigurava jasnoća predložene pravne norme u smislu njezinog usklađivanja s načelom dvostepenog upravnog rješavanja prema kojemu isključivo rješenja prvostepenog organa mogu biti predmetom žalbe i revizije.

#### AMANDMAN VII

U članu 17. Zakona dodaje se novi stav (5) koji glasi:

“(5) Rješenje drugostepenog organa iz stava (2) ovoga člana konačno je u upravnom postupku i protiv njega se može pokrenuti upravni spor”.

**Obrazloženje:** Predmetnim se amandmanom osigurava jasnoća predložene pravne norme u smislu njezinog usklađivanja s načelom dvostepenog upravnog rješavanja prema kojemu rješenja drugostepenog organa ne mogu biti predmetom žalbe i revizije, ali mogu biti predmetom upravnog spora čime se nezadovoljnim strankama osigurava korištenje standardnih pravnih lijekova.

#### AMANDMAN VIII

U članu 30. riječi “šest mjeseci” zamjenjuju se riječima “tri mjeseca”.

**Obrazloženje:** Uvažavajući činjenicu da će nakon usvajanja Zakona, a prije početka njegove primjene trebati realizovati nekoliko aktivnosti u smislu donošenja provedbenih podzakonskih akata, konfigurisanja i testiranja elektronske baze podataka, te obuke zaposlenika u centrima za socijalni rad, odnosno opštinskim službama socijalne zaštite, Vlada Federacije je ocijenila da je rok od tri mjeseca sasvim dovoljan za njihovu realizaciju, umjesto predloženih šest mjeseci.

V. broj: 1203/2021  
22.07.2021. godine  
Sarajevo



PREMIJER

Fadi Novalić